

雪  
堂  
叢  
刻

襄理軍務紀略卷一

咸豐八年戊午春英法等國有由上海抵津之信官紳會商海

防事宜是時張紳適赴文安英觀察

毓石太守

贊清

尹大令

佩

璿聯名專差函聘回津辦理團防

附錄來書略云前在鄉祠商辦海防事件面聆快論足徵碩

畫深謀欽佩之至茲該國已於二月十二日由上海起旋北

來有火輪船九隻戰船四十餘隻兵丁約有數千人不日卽

到此次該國情形斷非良善除

弟

等籌辦外因思閣下忠誠

素著人望攸歸必須仰仗鴻才以爲全津保障特遣家丁奉

迓望卽整歸裝刻日還津商辦一切想閣下念切桑梓諒不

至遲遲其行也

張紳知軍務緊急即於三月初一日束裝旋里隨往謁烏察院

勒洪阿及在城各憲共議團防事務

初四日尹大令令勸諭舖勇前咸豐三年粵匪犯境津郡舖勇皆自備器械旗幟聯絡一氣以防不虞今復令勸諭各舖義勇仍循舊章協力同心嚴查土匪奸細張紳素爲鄉里所重一經勸諭無不樂從 當張紳籌辦舖勇之際適費紳蔭樟由院署

請領辦團練經費銀二千兩使人以領狀知照書押查前奉

上諭派辦團練本有費蔭樟華樹王敬熙賈兆霖花上林張錦文等名在內費紳即於東關外玉皇閣設局總司其事張紳

恐其未諳事體將來難免轆轤因以現辦舖勇不能兼顧團練辭之後費紳果以辦理不善獲譴

初六日於郡城朝陽觀設立商團舖民總局局中事務紛繁必擇老成諳練之人襄理是日遂邀職員何珍孟敬熙傅長明奚廷琦何元英董其事

初七日邀集各舖局首事會議練勇章程是日各局未齊初二日各舖局皆到乃公同確議章程

初十日稟明舖勇不得外調請出示嚴禁阻撓情事蓋團練舖民分地設局本以郡城爲重倘有警報一經調遣則城內空虛奸宄易於蠢動張紳於是日稟明各憲所團練勇不聽外調恐



有無知小民從中阻撓並請出示嚴禁察院批仰天津縣出示曉諭頒發各局

附錄示略云奉憲諭團練舖勇原爲保護城池設局稽查守禦不得調赴他處如有人阻撓言語褻慢首事立即稟明定按奸細究辦

維時各舖勇皆擇地設局插豎旗幟排列器械城廂內外聯絡一氣並晝夜巡防不憚勞瘁 總局設立傳牌以作信符局務紛紜一日不知凡幾遇傳示各局事宜若無以爲憑恐不免弊端張紳令總局製造桃式傳牌四面上書飛速傳牌字樣此牌不輕發發則挨局傳遞自首局起至末局繳還不許遲滯時刻

又製軍令小對牌劈分各半總局鋪局各存一半鋪局遇有公事卽以對牌爲憑總局如專與一局議事亦用對牌傳調是時先後共聯絡鋪勇五十四局互相守望聲勢大張然練勇多寡宜綜計成數庶無知之徒不致冒充滋事張紳傳知各局造具花名清冊送交總局由總局彙造總冊分呈各憲備案

十九日察院點驗鋪勇是時鋪局業經聯絡一氣遂稟請察院示期點驗旋批於十九日在院署驗看至日衆鋪局皆鱗集朝陽觀午後以門旗領隊擊柝爲令張紳導由戶部街至西關外太平街復從太平街折行針市街歷經估衣街鍋店街至院署前察院率同都轉觀察守令列坐衆局首事於察院案前投遞

名帖後遂指揮練勇演放火器繼以雜技察院暨各憲皆謂部  
伍整齊技藝精熟慰勞張紳者再驗訖仍分路各歸本局 張  
紳恐日久偷安不時傳知各局稽查毋稍疎懈旋據北關外同  
街守望舖局董事拏獲形迹可疑山東招遠人王明一名送交  
總局當送縣訊明實非奸細立即遞回原籍管束賞該舖局錢  
十緡以示鼓勵 是時英法等國船隻停泊海口絕無退志張  
紳擬設防條陳呈於石太守適譚制軍廷襄來津太守將條陳  
代呈其略云現五國船隻逼近海口籌禦之策莫要於砲台砲  
台存則我軍佔踞地利該國船隻縱多萬難駛入砲台失則該  
國反客爲主我軍雖衆亦難制勝茲飭人前往海口砲台繪成

一圖海口南岸砲台三座直向海口架砲向外以擊來船北岸砲台一座與南岸砲台相隔二里許遙遙相對因思當日建立砲台方向大有深心蓋北岸砲台雖亦可架砲擊其來船實乃爲保護南岸砲台而設是北岸砲台尤爲緊要也然砲台架砲能擊來船來船亦能架砲擊我砲台現我軍扎營皆在砲台左右前面臨海俱係空闊之地我軍無可藏身難以避砲況該國輪船其行如矢倘架砲直進我軍稍一驚惶立脚不定勢必潰矣現今惟有於南岸砲台左右審其地勢堅築土壘安設砲眼架砲於內既可避其來鋒又可擊其來船以逸待勞萬無一失北岸砲台左右亦照式營築土壘我軍皆扎營於內以防其進



口直撲南岸砲台之患並擇險要河灣一二處皆築土壘砲台  
架設砲位屯扎兵勇以爲埋伏接應之用更不時操演技藝皆  
期精熟進可戰退可守始爲萬全之計再選殘損不堪用之船  
堆放柴草雜以桐油硝磺外用蓆片封嚴以備火攻如該國船  
隻進口卽將此船用火燃之順流而下亦足成一陣之功至於  
津郡城池仍用舖勇水團查拏奸細彈壓土匪互相防範如有  
警報鳴鉦爲號立即齊集在城人民各有身家當無不竭力捍  
衛又宜以恩義輔之撫諭開導以示我 皇上柔遠之至意  
蓋該國等非髮逆可比髮逆可剿除盡淨該國等豈能絕其根  
株若驟加以兵竊恐邊釁一開百年貽患但該國等性情無定

倘恃強藐視內地不肯稽服則整我軍旅懾以兵威俾該國知所警畏不敢再萌異志此平戎和戎之兩策也制軍閱之頗爲首肯

十二日接英觀察來札隨具覆書並言火攻一事張紳於海口情形時時籌畫意欲備辦損破剝船二十餘隻滿載引火之物於砲台外二三十里遠近預備火攻如該國等戰船相逼即移至上風處燃之風助火威其船足可燒燬適是日英觀察由大沽來札知其在朝陽觀設立總局聯絡鋪勇深爲獎勵因將此意於覆書內備言之

十三日制軍來諭言大沽砲台最爲緊要前見條陳內曾有築

立土壘一節煩速爲修理張紳遵即捐購大蓆數千捲海繩數百捆僱募民夫四百名差派家人隨同夥友攜帶工價前往大沽一帶修築此工將竣而營門大道又復塌陷來諭令即派人趕修隨通知辦理前項工程之人一併將大道上緊修墊並囑先稟明制軍方伯查核即日奉錢方伯析和批據稟於砲台地方捐築土牆以爲兵勇藏身之所足見急功好義凡於地方有裨之事該商勇往不辭殊堪嘉尙現制軍委弁協同辦理仰卽傳示該商夥會同尅日興工趕緊修築事竣之日定行詳請獎勵也仍將開工並工竣日期報查於是督飭民夫晝夜修理二十三日疊道之工告竣旣而制軍又諭開草頭沽地方應修土

壘疊道仍由該商一手經理以期妥速而昭慎重並將遵辦緣由稟覆查核同日奉到察院都轉觀察諭皆如前隨即備辦工料僱募人夫仍派前次經理之人復往草頭沽迅速照辦於二十八日土壘疊道一律報竣核計前後工程所需統用錢一萬四千緡有奇當經造冊稟明制軍查核旋蒙札行總局司道作速核議詳辦

附錄稟略云前奉鈞諭時正城內設局團練舖勇局務紛繁未克親往督辦經職長子候補道汝霖辦理惟當此多事之

秋食毛踐土者自應出力捐貲盡心籌辦況職父子身受

國恩有加無已尤當竭盡微忱力圖報効所有此項捐辦工



程之需不敢仰邀 恩獎

二十九日續立舖勇來局報冊彼時舖勇業已聯絡人人知奮聲勢頗振於是舖勇陸續又立十局造具清冊自行報交總局復經彙冊稟呈察院暨道府縣各衙署並聲明帶勇人等以備查核即蒙察院批示查勸練舖勇前於點驗後附片奏 聞奉到 硃批知道了欽此欽遵在案茲復據稟帶勇人等已悉夏四月一日改用鼗鼓號令前以有事擊柝爲號倘夜間有警擊柝傳信恐與支更之柝無少區別遂改爲鼗鼓傳知各舖局皆按式造備如有警報一聞總局鼓聲振響衆局立即接連播鼓齊集練勇執持器械以備抵敵但津郡水局號令亦間有用

此鼓者未免兩相混淆當即知照闔津水局首事令卽傳知衆水局暫停鼓鼓遇有火災概用鳴鈺集衆以四月初一日爲始俟軍務告竣再照舊章辦理 英法等國輪船久泊海口不退難保無奸細往來窺伺虛實張紳除傳知各局上緊稽查外又派局中董事孟敬熙等夜間分路巡邏以故閭閻靜謐安枕無虞

初三日將聯絡舖勇六十四局總冊呈送制軍查核備案旋奉批示據送原稟清冊存查該紳督飭勸辦迅速集事實屬急公可嘉 同日奉到制軍來札令卽豫備火攻勿致臨時有誤張紳隨派趙連通購置硫磺焰硝秫秸蘆葦一切引火之物運至

損破河剝船內安排妥協聽候調用

初八日海口接仗失機先未刻院署來信言海口已於今午合仗擊沈該國戰船四隻務望激勵所部團勇嚴加防範總局立發傳牌知照各舖局無分畛域上緊稽查勿稍疎懈旋據城外舖勇盤獲山東齊河縣人劉鳳貴一名城內舖勇盤獲直隸唐邑縣人劉發義一名均交總局由總局送縣核辦酉刻又驚聞砲台失守兵勇已退正在疑信之際忽東關外舖勇北關外舖勇咸報稱現有逃回馬隊京兵數騎沿河聲言砲台已失大營移扎新城同時河北舖勇報稱有馬隊數十騎現住河北店內業經派勇看守河東舖勇報稱有馬隊數百騎現在河東地面

業已派勇攔截事應如何辦理特來總局報信總局一面屬令  
看管一面稟明察院隨奉諭飭如有私自逃回兵勇立予緝拏  
刻卽傳知衆舖局一體遵辦於是將逃回馬隊皆未放行次日  
經制軍差戈什哈始以令箭調回彼時見有馬隊逃來始知砲  
台不保所傳之信不虛也當未接仗之先聞英法等國輪船已  
逾砲台停泊我軍失勢四鼓時城廂居民耳語驚惶張紳以事  
已至此倘居民逃避土匪必乘隙而起擄掠殘害勢所難免若  
不趕緊募勇彈壓郡城內外恐不可問況內患不弭外患更必  
難禦若俟該國等長驅直入城池非我有矣是以速令帶勇人  
等分赴各處招募卽刻聚集壯勇一千餘名其應募之人多係



無業貧民乏食則相聚爲非足食則可期禦侮是募勇而兼除  
劫搶也然人心叵測恐仍不免無賴之徒乘亂騷擾並派局中  
董事等統帶衆勇分路偵緝巡防復慮及鄉村鎮店土匪四起  
因將各處素稱强悍之人招至局中分別地方大小責令募勇  
多寡口糧均由總局支發並令認真嚴拏土匪護送逃民倘有  
搶奪之事卽惟帶勇者是問嗣後人心稍安而經費則浩繁矣  
先後統計募勇二千餘名帶勇頭目並聽差人等日需口糧千  
數百緡加以置備器械燈籠火炬等物又需一千餘緡至事竣  
核計共費四萬數千緡皆張紳捐之未科派一人

初十日辰刻有人報稱該國船隻業已試水前來制軍統帶兵